

## **E' il progresso, gente : il PROGRESSO !**

Me som corgiu ch'el mond l'era 'drè a cambià  
La prima volta, ormai tanti ann fa,  
Che gh'era in gir di gioinotei con di calzon  
Pien de sbreggh e filaper fina giò in fond  
E pensavi : i avran comprà d'on quai strascé  
Pori fioeu, g'avran minga de dané !

On quai an dopo me som corgiu che anca i tosan  
Per minga fagh spend trop ai so pori mam  
Risparmiaven su la stofa e se quataven giust assé  
Per minga met trop in mostra quel che scondeven dedré.

L'è minga finida : passà on quai an ammò  
On dì che caminavi sul Cors per andà in Dom  
Ohé : gh'era on sac de mat che parlaven de per lor.  
Te voeret vedè ch'han svoià 'l manicomi propi in 'sti or ?  
Poeu m'han spiegà ch'eren no mat, ma l'era gent  
Che stava al telefon cont'on quai amis on quai client.

Questa l'é bela : gh'è 'gnu vun a parlam di so afari  
Cont'ona protesi su 'n 'oregia : nient de straordinari  
Ho pensà : poeret, el sarà sord e me tocherà vosà  
Per fass capì e metel no in difficoltà  
Poeu ho sentu on "pit" e 'l s'è metu 'drè a parlà  
Cont'on quai vun che l'era minga lì.  
O Signor ! te voeret vedè che 'l mat som propi mi ?

E inscì ho capì che se voeri no perd la diligenza  
Con tuti 'sti scopert, tuta 'sta scienza,  
Ho de cor cunt i me gamb, mia cara gent,  
Che se restom indrè a contom propi pu nient !

*Don Arnaldo*